

PROGRAM RADA VIJEĆA/SAVJETA
ZA ZAŠTITU PRAVA INTELEKTUALNOG VLASNIŠTVA PRI INSTITUTU ZA
INTELEKTUALNO VLASNIŠTVO BOSNE I HERCEGOVINE
ZA 2011. GODINU

Vijeće za zaštitu prava intelektualnog vlasništva

Vijeće za zaštitu prava intelektualnog vlasništva osnovan je odlukom Vijeća ministara BiH od 10. juna 2010. sa ciljem da djeluje u pravcu:

- Izrade metodologije za prikupljanje informacija o sankcionisanju povreda prava intelektualnog vlasništva u BiH, od sudova, inspektorata i carine
- Uvođenja sistema za prikupljanje informacija o sankcionisanju povreda prava intelektualnog vlasništva u BiH, od sudova, inspektorata i carine
- Koncentrisanja i analize informacija o upravnom i sudskom sankcionisanju povreda prava intelektualnog vlasništva u BiH, radi njihovog objavljivanja u vidu godišnjeg izvještaja
- Analize iskustava sudova, inspektorata i carine u sankcionisanju povreda prava intelektualnog vlasništva
- Kontaktiranja sa subjektima koji trpe najveću štetu od piratstva i prometa krivotvorenim robom u BiH, sa ciljem da se prikupe sugestije za efikasnije sankcionisanje povreda prava intelektualnog vlasništva
- Praćenja relevantnih godišnjih pregleda procjene raširenosti piratstva i prometa krivotvorenim robom u BiH, koje izrađuju međunarodne vladine i nevladine agencije
- Praćenja inicijativa i procesa u svijetu, a posebno u EU, koji su usmjereni na borbu protiv piratstva i prometa krivotvorenim robom
- Staranja da praksa suzbijanja piratstva i prometa krivotvorenim robom u BiH bude harmonizovana sa praksom u EU
- Iniciranja propagandnih akcija usmjerenih na suzbijanje piratstva i prometa krivotvorenim robom.

Program rada Vijeća za zaštitu prava intelektualnog vlasništva

Tokom 2011. godine Vijeće će održati svoju prvu konstituirajuću sjednicu na kojoj će verifikovati članove, usvojiti Poslovnik o radu i usvojiti Program rada za 2011. godinu. Poslije toga, Vijeće će raditi prema sljedećem Programu rada:

a) **Obuka članova Vijeća u oblasti prava intelektualnog vlasništva.** Obuka je pretežno opšteg tipa i sadrži sljedeće teme:

- Pojam i vrste intelektualnog vlasništva
- Ekonomska osnova prava intelektualnog vlasništva
- Aktualni društveno-politički kontekst prava intelektualnog vlasništva u svijetu, Evropi i BiH
- Pitanja privrednog korištenja intelektualnog vlasništva
- Pitanja sprovođenja prava intelektualnog vlasništva
- Uloga Vijeća.

b) **Obuka članova Vijeća u oblasti upravne i sudske zaštite prava intelektualnog vlasništva.**

Obuka je specijalizovana i sadrži sljedeće teme:

- a. Pojam povrede prava intelektualnog vlasništva
- b. Pojam povrediooca prava intelektualnog vlasništva
- c. Pitanje odgovornosti za povredu prava intelektualnog vlasništva
- d. Zaštita prava intelektualnog vlasništva u upravnom postupku
 - Inspekcija
 - Carina (tzv. mjere na granici)
- e) Zaštita prava intelektualnog vlasništva u građanskom sudskom postupku
 - Tužbeni zahtjevi
 - Privremene mjere
 - Mjere za obezbjeđenje dokaza
- f) Zaštita prava intelektualnog vlasništva u krivičnom postupku
- g) Specifičnosti zaštite prava intelektualnog vlasništva na Internetu

c) **Sjednica posvećena razmatranju osnivanja državnog koordinacionog tijela za zaštitu prava intelektualnog vlasništva na operativnom nivou.** Sjednici bi trebalo da prisustvuju predstavnici SIPA-e, Uprave za indirektno oporezivanje, tržišne inspekcije entiteta i Brčko distrikta, Agencije BiH za nadzor nad tržištem, tužilaštva BiH, Suda BiH, Regulatorne agencije za komunikacije, i ostalih tijela unutar BiH, nadležnih za provođenje propisa iz oblasti prava intelektualnog vlasništva. Takođe, na sjednicu bi trebalo pozvati i predstavnike odgovarajućih koordinacionih tijela država iz regiona. Predstavnici navedenih institucija bi trebalo da održe kraću prezentaciju svog rada u oblasti zaštite intelektualnog vlasništva, kao i da istaknu probleme sa kojima se susreću. Takođe, oni bi trebalo da ocijene cjelishodnost uspostavljanja određenog oblika međusobne stalne institucionalne saradnje na nivou razmjene informacija i preduzimanja zajedničkih akcija. Cilj ove sjednice je da Vijeće sačini preporuku koju će uputiti Vijeću ministara BiH da osnuje Stalno koordinaciono tijelo za zaštitu intelektualnog vlasništva, koje bi na permanentnoj osnovi omogućilo operativnu saradnju između pomenutih institucija.

d) **Sjednica posvećena problemu prikupljanja i obrade podataka o upravnim i sudskim predmetima vezanim za zaštitu intelektualne svojine na teritoriji BiH.** Na sjednicu bi trebalo pozvati predstavnike SIPA-e, Uprave za indirektno oporezivanje, tržišne inspekcije entiteta i Brčko distrikta, Agencije BiH za nadzor nad tržištem, tužilaštva BiH, Suda BiH, redovnih i privrednih sudova entiteta i Brčko distrikta, Agencije za statistiku BiH, Federalnog zavoda za statistiku i Republičkog zavoda za statistiku RS-a. Predstavnici navedenih institucija bi trebalo da upoznaju Vijeće s tim da li i kako vode evidenciju o predmetima iz oblasti zaštite intelektualnog vlasništva, da li i na koji način se ta evidencija sistematizuje i objavljuje. Na sjednici bi trebalo razmotriti pitanja

formata i sadržaja obrasca na kojem bi pojedine institucije mogle evidentirati pomenute predmete, koje bi dostavljale Institutu za intelektualno vlasništvo BiH radi pripreme odgovarajućeg godišnjeg statističkog pregleda. Cilj ove sjednice je da Vijeće preporukom pokrene inicijativu za izradu i usvajanje oficijelnih evidencionih obrazaca, kao i za propisivanje obaveze vođenja evidencije o upravnim i sudskim predmetima vezanim za zaštitu intelektualnog vlasništva.

4) Organizacione napomene

Predloženi Program može biti realizovan u 3-4 sjednice svakog vijeća. Pri tom, moguće je da se dio specijalističke obuke vijeća spoji sa po jednom tematskom sjednicom.

Ukoliko finansijski ili drugi organizacioni razlozi budu nalagali manji broj sjednica, pristupilo bi se izboru najprioritetnijih tema iz Programa, te Program ne bi bio u cjelini realizovan u 2011. godini.

Bilo bi racionalno kad bi vijeće održala prvu, konstituirajuću sjednicu istog dana na istom mjestu, kako bi uvodna obuka mogla da se obavi za sva tri vijeća odjednom.

Vremenski plan održavanja sjednica svakog vijeća odrediće Institut za intelektualno vlasništvo BiH u saradnji sa USAID IPR Projektom.

U Sarajevu, 22. februara 2011. godine

Predsjedavajući Vijeća

Zorislav Zadić